

PATNUBAY SA MISA

8 Hulyo 2018

Ika-14 na Linggo sa Karaniwang Panahon


Taon B

MGA PROPETA NG DIYOS SA MUNDONG WALANG PANINIWALA

Ngayo’y ipinaaalaala sa atin ang patuloy na pagkalinga ng Diyos sa lahat ng tao, pati na sa tumatanggi sa Kanya at naliligaw ng landas. Ilan sa mga pinakamalinaw na tanda ng Kanyang pagmamahal ay ang mga propetang sinusugo Niya sa Kanyang bayan upang paalalahanan sila sa kanilang mga tungkulin at ipaunawa sa kanila ang malaking pinsalang dulot nila sa kanilang kapwa at sa kanilang sarili sa pamamagitan ng kanilang masamang asal.

Si Hesus, ang pinakadakila sa lahat ng propeta, ay dumanas ng mapait na pagtatakwil at ngayo’y pinaaalalahanan niya ang kanyang mga disipulong sila man ay magkakaganoon din. Sa halip na panghinaan ng loob, tayo’y dapat na magsikap na maging tapat sa ating misyon bilang propeta sa Simbahan at sa lipunan alinsunod sa halimbawa mismo ni Hesus.

Sa Eukaristiyang ito, hilingin natin ang biyaya upang magawa ito, ano man ang mangyari.



PASIMULA

Pambungad

(Ipahahayag lamang kung walang awiting nakahanda.)

Sa iyong templo, Poong D’yos, aming isinasalob ang’yong pag-ibig na lubos. Papuri ng sansinukob sa malasakit mong taos.

Pagbati

P– Pagpalain nawa si Hesus, ang dakilang Propeta ng Ama at ng Espiritu. Ang kanyang biyaya ay sumainyong lahat!

B– At sumaiyo rin!

Pagsisisi

P– Sa paghahanda nating ipagdiriwang ang mga banal na misteryo, alalahanin natin ang ating mga kasalanan. (Manahimik saglit.)

P– Di mo nais na mamatay ang mga makasalanan kundi magbalik-loob sila sa iyo at maligtas. Panginoon, kaawaan mo kami!

B–Panginoon, kaawaan mo kami!

P–Naparito ka upang mapagbalik-loob ang mga makasalanan. Kristo, kaawaan mo kami!

B–Kristo, kaawaan mo kami!

P–Ipinananalangin mo kami sa kanan ng Ama. Panginoon, kaawaan mo kami!

B–Panginoon, kaawaan mo kami!

P–Kaawaan tayo ng makapangyarihang Diyos, patawarin tayo sa ating mga kasalanan, at patnubayan tayo sa buhay na walang hanggan.

B–Amen!

Papuri

B–Papuri sa Diyos sa kaitaasan at sa lupa’y kapayapaan sa mga taong kinalulugdan niya. Pinupuri ka namin, dinarangal ka namin, sinasamba ka namin, ipinagbunyi ka namin, pinasasalamatan ka namin dahil sa dakila mong angking kapurihan. Panginoong Diyos, Hari ng langit, Diyos

Amang makapangyarihan sa lahat.

Panginoong Hesukristo, Bugtong na Anak, Panginoong Diyos, Kordero ng Diyos, Anak ng Ama. Ikaw na nag-aalis ng mga kasalanan ng sanlibutan, maawa ka sa amin. Ikaw na nag-aalis ng mga kasalanan ng sanlibutan, tanggapin mo ang aming kahilingan. Ikaw na naluluklok sa kanan ng Ama, maawa ka sa amin. Sa-pagkat ikaw lamang ang banal, ikaw lamang ang Panginoon, ikaw lamang, O Hesukristo, ang Kataas-taasan, kasama ng Espiritu Santo sa kadakilaan ng Diyos Ama. Amen!

Panalangin Pambungad

P –Ama naming makapangyarihan, pakundangan sa pagpapakumbaba ng Anak mong masunurin, ibinangon mo sa pagkadapa ang sangkatauhang masuwayin. Ipagkaloob mo sa amin ang banal na kagalakan upang kaming sinagip mo sa kaalipinan ay magkamit

ng iyong ligayang walang katapusan, sa pamamagitan ni Hesukristo kasama ng Espiritu Santo magpasawalang hanggan. **B – Amen!**

PAGPAPAHAYAG NG SALITA NG DIYOS



Unang Pagbasa Ez 2:2-5

Sa kabila ng di magandang saloobin ng mga makasalanang, walang pinababayaan ang Diyos upang sila’y mapagbalik-loob.

Ang paghirang kay Ezekiel na magtungo at mangaral sa mga Israelita ay nagpapatunay ng tuwinang malasakit ng Diyos sa kaligtasan ng pinakamatigas mang makasalanang.

L– Pagpapahayag mula sa Aklat ni Propeta Ezekiel

Noong mga araw na iyon, nilukuban ako ng Espiritu at itinayo ako upang pakinggan ang isang tinig na nagsasabi:

“Tao, susuguin kita sa Israel, sa bansang suwail. Pagkat mula sa kanilang ninuno, naghihimagsik na sila sa akin hanggang ngayon. Matigas ang kanilang ulo at walang pitagan. Kaya puntahan mo sila at sabihin mong ito ang ipinasasabi ng Panginoong Diyos. Sa makinig sila o sa hindi – pagkat matigas nga ang kanilang ulo – malalaman nilang may isang propeta sa gitna nila.”

Ang Salita ng Diyos!

B – Salamat sa Diyos!

Salmong Tugunan Awit 122

B – Mata nami’y nakatuon sa awang Panginoon!

R. M. Velez



* Ang aking pangmasid doon nakapukol, sa luklukang trono mo, O Panginoon. Tulad ko’y aliping ang inaasahan ay ang amo niya para matulungan. **B.**

* Kaya walang humpay ang aming tiwala, hanggang ikaw, Poon, sa ami’y maawa. Mahabag ka sana, kami’y kaawaan, labis na ang hirap naming tinataglay. **B.**

* Kami’y hinahamak ng mga mayaman, matagal na kaming laging inuuyam ng mapang-aliping palalo’t mayabang. **B.**

Ikalawang Pagbasa 2 Cor 12:7-10

Maging ang mga dakilang santo ay may kahinaan tulad ng mahiwagang “tinik sa laman” na binabanggit ni San Pablo sa sipi ngayon. Sa mata ng Diyos, ang mahalaga’y ang ating pakikipagtulungan sa Kanyang biyaya.

L– Pagpapahayag mula sa Ikalawang Sulat ni Apostol San Pablo sa mga taga-Corinto

Mga kapatid:

Para hindi ko ipagyabang ang kamangha-manghang pahayag ng Diyos sa akin, ako’y binigyan ng isang kapansanan sa katawan na nagsisilbing pamalo ni Satanas upang huwag akong magpalalo. Tatlong beses kong idinalangin sa Panginoon na alisin ito, ngunit ganito ang kanyang sagot, “Ang tulong ko’y sapat sa lahat ng pangangailangan mo; lalong nahahayag ang aking kapangyarihan kung ikaw ay mahina.”

Kaya’t buong galak na ipagmapuri ko ang aking kahinaan upang palakasin ako ng kapangyarihan ni Kristo. Dahil kay Kristo, walang halaga sa akin kung ako ma’y mahina, kutayin, pahirapan, usigin, at magtiis. Sapagkat kung kailan ako mahina, saka naman ako malakas.

Ang Salita ng Diyos!

B – Salamat sa Diyos!

Aleluya

Lu 4:18

B – Aleluya! Aleluya!

Ikaw, Kristo, ay sinugo upang sa dukha’y magturo, magpalaya sa bilanggo. **Aleluya! Aleluya!**

Mabuting Balita Mc 6:1-6

Matagumpay si Hesus sa simula ng kanyang misyon. Ngunit naharap din siya sa mga di-pagkakaunawaan at pagtutol. Sa sipi ngayon, sinasabing una siyang nabigo sa sariling bayan na kanyang kinalakhan at tinirhan nang mga 30 taon.

P– Ang Mabuting Balita ng Panginoon ayon kay San Marcos

B– Papuri sa iyo, Panginoon!

Noong panahong iyon, si He-

sus ay nagtungo sa sariling bayan, kasama ang kanyang mga alagad. Pagdating ng Araw ng Pamamahing, nagturo siya sa sinagoga. Nagtaka ang maraming nakarinig sa kanya at nagtanong, “Saan niya nakuha ang lahat ng iyan? Anong karunungan itong ipinagkaloob sa kanya? Paano siya nakagagawa ng mga kababalaghan? Hindi ba ito ang karpinterong anak ni Maria, at kapatid nina Santiago, Jose, Judas, at Simon? Dito nakatira ang kanyang mga kapatid na babae, hindi ba?” At siya’y ayaw nilang kilanlin.

Kaya’t sinabi ni Hesus sa kanila, “Ang propeta’y iginagalang ng lahat, liban lamang ng kanyang mga kababayan, mga kamag-anak, at mga kasambahay.” Hindi siya nakagawa ng anumang kababalaghan doon, maliban sa pagpapatong ng kanyang kamay sa ilang mayasakit upang pagalingin ang mga ito. Nagtaka siya sapagkat hindi sila sumampalataya.

Ang Mabuting Balita ng Panginoon!

B – Pinupuri ka namin, Panginoong Hesukristo!

Homiliya

Sumasampalataya

B– Sumasampalataya ako sa Diyos Amang makapangyarihan sa lahat, na may gawa ng langit at lupa.

Sumasampalataya ako kay Hesukristo, iisang Anak ng Diyos, Panginoon nating lahat. Nagkawatang-tao siya lalang ng Espiritu Santo, ipinanganak ni Santa Mariang Birhen. Pinagpakasakit ni Poncio Pilato, ipinako sa krus, namatay, inilibing. Nanaog sa kinaroroonan ng mga yumao. Nang may ikatlong araw nabuhay na mag-uli. Umakyat sa langit. Naluluklok sa kanan ng Diyos Amang makapangyarihan sa lahat. Doon magmumulang paririto at huhukom sa nangabubuhay at nangamatay na tao.

Sumasampalataya naman ako sa Diyos Espiritu Santo, sa banal na Simbahang Katolika, sa kasamahan ng mga banal, sa kapatawaran ng mga kasalanan, sa pagkabuhay na muli ng nangamatay na tao at sa buhay na walang hanggan. Amen!

Panalangin ng Bayan

P—Karaniwan nang malinaw na palatandaan ng pagmamahal ng Diyos sa Kanyang bayan ang mga propeta. Kailangan natin sila ngayon tulad noong araw. Ipanalangin natin ang lahat ng tinatawag sa ganitong uri ng paglilingkod sa ating panahon:

B—Panginoon, dinggin Mo ang aming panalangin!

* Nawa ang Simbahang Katoliko ay maging tapat, walang takot o pag-aalinlangan sa kanyang tungkulin bilang propeta sa mundo. Manalangin tayo! **B.**

* Nawa ang mensahe ng mga propeta noong araw ay maiangkop sa ating kalagayan ngayon at mapagbunga ng pagbabalik-loob at kabutihan. Manalangin tayo! **B.**

* Nawa lumago ang tunay na propesiya sa Simbahan at kilalanin ng kanyang mga pinuno at mga mananampalataya. Manalangin tayo! **B.**

* Nawa ang mga nahirang sa paglilingkod bilang propeta ngayon ay di mangamba sa hamon sa kanilang misyon o sa banta ng pagtatakwil. Manalangin tayo! **B.**

* Nawa ang mga nahirang sa paglilingkod bilang propeta ay mamuhay nang alinsunod sa mensaheng kanilang ipinangangaral. Manalangin tayo! **B.**

* Nawa lahat ng nagtataguyod ng kapayapaan sa ating bansa at iba pang panig ng daigdig ay makatagpo ng kailangan nilang pakikipagtulungan. Manalangin tayo! **B.**

* Tahimik nating ipanalangin ang ating pansariling kahilingan. (*Tumigil saglit.*)

Manalangin tayo! **B.**

P—Panginoong Diyos, padalhan Mo kami ng marami at karapat-dapat na mga propeta para malinaw naming makilala ang Iyong kalooban at tupdin itong tapat sa pamamagitan ni Kristo na aming Panginoon.

B—Amen!



P—Manalangin kayo . . .

B—Tanggapin nawa ng Panginoon itong paghahain sa iyong mga kamay sa kapurihan niya at karangalan, sa ating kapakinabangan at sa buong Sambayanan niyang banal.

Panalangin ukol sa mga Alay

P—Ama naming Lumikha, ang paghahain namin sa iyong ngalan ay siya nawang sa ami'y dumalisay upang ito ay maging pagganap araw-araw ng aming paglipat sa buhay sa kalangitan sa pamamagitan ni Hesukristo kasama ng Espiritu Santo magpasawalang hanggan.

B—Amen!

Prepasyo II

P—Ama naming makapangyarihan, tunay ngang marapat na ikaw ay aming pasalamat sa pamamagitan ni Hesukristo na aming Panginoon.

Lubhang nabagbag ang kanyang loob sa pagkakamali ng tao sa sansinukob, kaya't minabuti niyang siya'y ipanganak ng Birheng bukod mong pinagpala sa babaing lahat. Sa labi ng imbing kamatayan kami ay inagaw ng namatay mong Anak. Sa pagkabuhay niya, kami'y kanyang binuhay upang kaugnayan namin sa iyo'y huwag magwakas.

Kaya kaisa ng mga anghel na nagsisiawit ng papuri sa iyo nang walang humpay sa kalangitan, kami'y nagbubunyi sa iyong kadakilaan:

B—Santo, santo, santo . . .

Pagbubunyi

B—Aming ipinahahayag na namatay ang 'yong Anak, nabuhay bilang Mesiyas at magbabalik sa wakas para mahayag sa lahat.



B—Ama namin . . .

P—Hinihiling namin . . .

B—Sapagkat iyo ang kaharian at ang kapangyarihan at ang kapurihan magpakailanman! Amen!

Paanyaya sa Kapayapaan

Paghahati-hati sa Tinapay

B—Kordero ng Diyos . . .

Paanyaya sa Pakikinaabang

P—Ito ang Kordero ng Diyos na nag-aalis ng mga kasalanan ng sanlibutan. Mapalad ang mga inaanyayahan sa kanyang piging.

B—Panginoon, hindi ako karapat-dapat na magpatuloy sa iyo ngunit sa isang salita mo lamang ay gagaling na ako.

Antipona ng Pakikinaabang

(*Ipahahayag lamang kung walang awiting nakahanda.*)

Lasapin ninyo at tikman ang sarap ng pagmamahal ng Panginoong Maykapal. Malaki ang kapalaran pag s'ya'y pinagtiwalaan.

Panalangin Pagkapakinabang

P—Ama naming mapagmahal, kaming iyong pinapakinabang ay loobin mong laging lumigon sa pinanggalingan ng tinanggap namin ngayon para pagsaluhan sa pamamagitan ni Hesukristo kasama ng Espiritu Santo magpasawalang hanggan.

B—Amen!

PAGWAWAKAS



P—Sumainyo ang Panginoon.

B—At sumaiyo rin!

P—Magsiyuko kayo at ipanalangin ang pagpapala ng Diyos.

(*Manahimik saglit.*)

Dinggin nawa ninyo ang mensahe ng matatandang propeta na umaabot sa atin sa pamamagitan ng Banal na Kasulatan.

B—Amen!

P—Maunawaan nawa ninyong kayo ay kalahok sa pampropetang misyon ni Kristo.

B—Amen!

P—Ang buhay nawa ninyo ay maging patotoo sa mensaheng inyong ipahahayag sa inyong lipunan.

B—Amen!

P—Pagpalain nawa kayo ng makapangyarihang Diyos: Ama, Anak, at Espiritu Santo.

B—Amen!

P—Humayo kayo sa kapayapaan at maging propeta ng Panginoon sa inyong pang-araw-araw na buhay.

B—Salamat sa Diyos!

ITINAKWIL NG SARILI NIYANG BAYAN

Ang mapahalagahan at tanggapin ay isang pangunahing pangangailangang pantao. Tuwinang masakit ang itakwil lalo na kung ito'y buhat sa mga mahal natin sa buhay.

Karamihan sa mga propeta ng Israel, lalo na sina Jeremias at Ezekiel, ay dumanas ng pagtangi't pagtatakwil buhat sa mga taong pinagpadalhan sa kanila ng Diyos. (*Sangguniin ang Unang Pagbasa.*)

Gayon din si Hesukristo, ang pinakadakila sa lahat ng propeta. Hula nga ni Simeong siya'y magiging "isang tandang hahamakin" (*Lu 2:34*). At ang mga taga-Nazaret – mga kababayan ni Hesus – ang unang nagpatotoo sa gayong propesiya. (*Sangguniin Mc 6:3-6.*)

Akala nila'y kilalang-kilala na nila si Hesus (*sangguniin Mc 6:3*). Kasama nila siya nang 30 taon! Nang siya'y bumalik sa kanila bilang "tagapaghatid ng Mabuting Balita," tinanggihan nila siya bilang "ang Kristo," ang Itinatangi ng Diyos, ang Tagapagligtas ng mundo – ang *kanilang Tagapagligtas*. Wari silang binulag ng kanilang mga maling palagay hanggang sa tanggihan nila ang kaligtasang sinadya rito ni Hesus. At ito'y ikinalungkot niya nang labis. (*Sangguniin Mc 6:6.*)

Gayunman, ang pagtatakwil ng mga kababayan sa Nazaret ay simula lamang ng waring "isinakatuparang propesiya" na nagbabadya ng maraming iba pang pagtatakwil na daranasin ni Hesus at mahahantong sa Kalbaryo – ang pinakamasaklap na pagtatakwil na kagagawan at pinangunahan ng mga pinunong relihiyoso.


Patuloy pa rin hanggang ngayon ang pagtatakwil kay Hesus bilang ang "Mesiyas" ng marami sa mga Israelita. Gayon ang kanilang trahedyang. "Naparito siya sa kanyang bayan ngunit hindi siya tinanggap ng kanyang mga kababayan" (*Jn 1:11*)! Tinangisan ni Hesus nang gayon na lamang ang Jerusalem sa di nito pagkilala sa oras ng "pagdating" ng Diyos (*Lu 19:41-44*).

Lahat ng ito ay isang babala sa buong mundo (at sa atin din) ngayon. Hindi sapat na tanghalin natin si Hesus na isang "Superstar," "isang pantas," "kaibigan ng mahihirap." Dapat natin siyang tanggapin lalong-lalo na bilang Anak ng Diyos at Tagapagligtas ng sangkatauhan. Ang pagtangi sa gayong pagkilala ay siyang pinakamasaklap na anyo ng espirituwal na pagpapatiwagal pagkat "kay Hesukristo lamang matatagpuan ang kaligtasan" (*Gw 4:12*)!

NAANTIG ka ba ni PAPA FRANCISCO sa kanyang pagdalaw sa Pilipinas?

Buhaying muli ang mga sandaling iyon at kumuha ng inspirasyon sa kanyang mga homiliya at talumpati.

ON A MISSION OF MERCY AND COMPASSION (Study Edition)



Mayroon ding isang kumpletong Talatuntunan sa Pag-aaral at mga Mungkahing Metodolohiko. At maiikling talambuhay nina Papa Francisco, Papa Pablo VI at Papa Juan Pablo II. Mayroon ding buod ng kanilang mga Pagdalaw na Pastoral sa Pilipinas!

MAANTIG ka upang KUMILOS ayon sa mga magagandang tagubilin ng Santo Papa! Umorder na ngayon sa Word & Life Publications! Maaari ring bumili sa mga *religious bookstores* at National Book Store.

Makinig sa **Radyo Totoo** (846 kHz) tuwing **Sabado ala-5:00 hanggang ala-6:00 ng gabi**, at makibahagi sa **"BISPERAS SA VERITAS"** – ang masigla't "interactive" na palatuntunang pantulong para tuklasin ang mensahe ng Salita ng Diyos para sa ikatatatag ng inyong buhay, mag-anak, at pamayanan.



**WORD & LIFE
PUBLICATIONS**

Don Bosco Compound, A. Arnaiz Ave. cor. Chino Roces Ave., Makati, Metro Manila

Postal Address: P.O. Box 1820, MCPO, 1258 Makati, Metro Manila, Philippines

Tel. Nos. 894-5401; 894-5402; 892-2169 • Telefax: 894-5241 • Website: www.wordandlife.org

• E-mail: marketing@wordandlife.org; wordandlifepublications@gmail.com • FB: Word & Life Publications

• Editorial Team: Fr. S. Putzu, C. Valmonte, G. Ramos, V. David, J. Domingo, A. Adsuara, D. Dagui

• Illustrations: A. Sarmiento, B. Cleofe • Marketing: Fr. B. Nolasco and T. Mojica • Circulation: R. Saldua